

Presidência da República Democrática de Timor-Leste

KOMUNIKADU IMPRENSA

PREZIDENTE REPÚBLIKA ASEITA PEDIDU HUSI PRIMEIRU-MINISTRU DADA-FALI KARTA PEDIDU DEMISAUN

Palásiu Prezidensial Nicolau Lobato, 15 abril 2020

Iha loron 8 abril 2020, kuarta-feira, Primeiru-Ministru deklara katak nia mai ko'alia ho Prezidente República kona-ba moras COVID- 19 no medida sira ne'ebé Governu implementa ona atu moras ne'e labele hadaet ba beibeik iha Timor-Leste.

Asuntu ida seluk mak dada-sai fali karta pedidu demisaun husi Primeiru-Ministru ne'ebé hatama iha 24 febreiru 2020.

Hafoin enkontru semanal entre titular rua ne'e, Primeiru-Ministru haruka karta ba Prezidente República hodi reafirma nia pedidu dada fali ninia karta pedidu demisaun.

Ohin, Prezidente República haruka ona karta ba Primeiru-Ministru katak aseita Primeiru-Ministru dada-sai karta pedidu demisaun ne'e.

Tuir artigu 112º, alínea b) Konstituisaun RDTL, kompete ba Prezidente República simu ka la simu pedidu demisaun husi Primeiru-Ministru. Kompete mós ba Prezidente República, aseita ka lae pedidu dada-sai pedidu demisaun husi Primeiru-Ministru, bainhira Prezidente República seidauk foti desizaun kona-ba pedidu demisaun.

Liu husi karta ne'e, Prezidente República reafirma katak Primeiru-Ministru sei hala'o nafatin ninia knaar baibain ho efeitu konstitusional no legál hotu-hotu.

Prezidente República hatete mós katak sei fó kolaborasaun institusional ne'ebé presiza atu Primeiru-Ministru bele hala'o ninia mandatu nu'udar Xefe Ezekutivu, atu asegura funsionamentu regular VIII Governu Konstitusional, tuir ita-nia Konstituisaun República.

Hasees-an husi COVID -19 no asegura rekuperasaun husi efeitu aat husi inundasaun Dili iha 13 marsu 2020 tama iha âmbito interese nasional, Prezidente afirma. Iha mós karta ne'e, Prezidente República deklara katak Estadu Timor-Leste presiza prepara no hahú rekuperasaun ekonómika no sosiál.

Husi asuntu interese nasional sira ne'e mak Prezidente República konfirma nesesidade atu asaun governativa husi Primeiru-Ministru no VIII Governu Konstitusional kontinua nafatin.